



佛說摩訶衍寶積經：「有常是一邊，無常為二邊，此二中間無色，不可見亦不可得，是謂中道真實觀法。有我是一邊，無我是二邊，此二中間無色，不可見亦不可得，是謂中道真實觀法。有真實心者，是謂一側，無真實心者，是為二側，無心、無思、無意、無識，是謂中道真實觀法。如是，不善法、世間法、有諍法、有漏法、有為法、有穢汚法、是謂一側，如是，善法、出世間法、無諍法、無漏法、無為法、白淨之法。是為二側；此二中間，無所有亦不可得，是謂中道真實觀法。有者是一側，無者是二側，此二中間，無所有亦不可得，是謂中道真實觀法。……無明緣行，行緣識，識緣名色，名色緣六入，六入緣更樂，更樂緣痛，痛緣愛，愛緣取，取緣有，有緣生；生緣老死苦惱，憂悲啼泣，如是，生大苦陰。無明已盡，則行盡；行盡，則識盡；識盡，則名色盡；名色盡，則六入盡；六入盡，則更樂盡；更樂盡，則痛盡；痛盡，則愛盡；愛盡，則取盡；取盡，則有盡；有盡，則生盡；生盡，則老、死、苦惱、憂悲皆盡；如是，滅大苦陰。無有此二，亦無二行，中間可知。是謂中道真實觀法。如是，行，行盡，識，名色，六入，更樂、痛、愛、取、有、生、老、死、老死盡；無有此二，亦無二行，中間可知。如是，迦葉！是謂中道真實觀法。復次，迦葉！中道真實觀諸法者，不以空三昧觀諸法空；諸法自空故。不以無想三昧觀諸法無想；諸法自無想故。不以無願三昧觀諸法無願；諸法自無願故。不以無行觀諸法無行；諸法自無行故。不以無起觀諸法無起；諸法自無起故。不以無生觀諸法無生；諸法自無生故。不以如觀諸法如；諸法自如故。是謂中道真實觀法。」不假外求，本自具足，謂之真實？不著文字，不落二邊，謂之中道。本經為大寶積經一二二卷普明菩薩會之重譯。更

樂、唐譯作觸。痛、唐譯作受。
大方廣善巧方便經卷第二：「作愛菩薩，入舍衛城乞食。有長者女，名曰上財，容華蓋世，人所愛慕，施食菩薩已，即生染著之心。作愛菩薩，即知其念；菩薩爾時，於食染法，無所作意。即自思維：於須臾若起一念貪染心者，是大過失。何以故？今此女人我於何處而生可愛？若彼眼根為可愛者，眼是無常，敗壞不淨肉團，彼自性空，何所愛樂？若於耳、鼻、舌、身、意根，為可愛者，彼復如是，自性皆空，無有實法、何所愛樂？如是從足至頂，乃至內外中間，一一如實審諦觀察，是中無有少法可得。我今如是實觀已，於一切法悉無所有。法無有故，即法無生。菩薩作是思維時，生無即得法忍。」對境貪著，對境解脫，從知煩惱菩提，無二無別，是在當人一念邪正之間而已耳。學佛之人倘能於此緊要關頭，體念省察，方能得到真實受用。
佛說大乘入諸佛境界智莊嚴經卷第三：「妙吉祥！若一切無所得，即一切法平等。若法平等，即法常住。若常住，即無動。無動，即無依。若一切法無所依止，即心無所住。心無所住，即無生而生。」金剛經云：不住色生心，不住聲香味觸法生心；應無所住而生其心。或問既不住色聲香味觸法，如何復能生心，則此無生而生四字，可為一明確之解答。
如來莊嚴智慧光明入一切佛境界經卷下：「若依因緣生一切法者，彼常不生。若常不生者，彼常不可得。若常不可得者，彼得實際法。若得實際法者，彼不共一切法住。若不共一切法住者，彼不共住。若不共住者，彼非有非無。若非有非無者，彼得法中住。若得法中住者，彼得修行正念法。若得修行正念法者，彼無一法非是佛法。何以故？以覺一切法空故。文殊師利覺一切法空者名為菩提。菩提者名覺一切法空。空者即是菩提。如是空無相無願，無作，無行，無依無生，無取無處，覺如是法者名為菩提。」不嘗為金剛經云：須菩提！如來所得阿耨多羅三藐三菩提，於是中無實無虛；是故如來說一切法，皆是佛法。須菩提！此言一切法者，即非一切法，是故名一切法。下一註脚。法中住者，住法中道之義，即金剛經無實無虛之意也。
如來莊嚴智慧光明入一切佛境界經卷下：「一切法自性清淨，因緣而有。又菩薩摩訶薩如實知染淨因，而不住染淨因中者。起我起見，是名染因。入一切法無我，是名淨因。見我所，是名染因。內寂靜，外不行，是名淨因。欲瞋恨害覺觀，是名染因。不淨，茲悲喜捨，入十二因緣忍，是名淨因。四顛倒是染因，四念處是淨因。五蓋是染因，五根是淨因。六入是染因，六念是淨因。七非淨法是染因，七覺分是淨因。八邪法是染因，八正法是淨因。九惱事是染因，九次第定是淨因。十不善業道是染因，十善業道是淨因。略說一切不善念是染因，一切善念是淨因。所言染因淨因，彼一切法自性空，無我，無人，無命，無壽者，無我所，無使者，如幻無相寂靜。內寂靜者，即是寂滅。寂滅者，即是自性清淨。」自性清淨，因緣而有。菩薩深明因緣生法，自性清淨，故不住染因，亦不住淨因；如有淨因可住，即此淨因，已為染因矣。